

CALETES ET BONONIENSES.

DE hoc tractu Bononiensi sic dicit Robertus Cœnalis, de re Gallica libri. II.
Perioche. III. De Gessoriaco Morinorum portu recte cum Meiero dixerim, verè dici Boloniam maritimam, à qua ad Douerium portum Angliae, breuiissimus est traiectus. Gessoriacum autem nauale (quod falso Gandavum Bilaldus affirmat) potius crediderim esse Castellum, nunc Cassel. Sunt, qui alio nomine Petressam vocant, & Scalas, vulgo Scales. Porrò ex Boloniae situ facile est coniectare, an Iccius portus dici debeat. Quia in re ne quis hæsit, illud ex Strabone sciendum, Interiectum maris ab Iccio in Angliam, trecenta viginti, nec amplius, stadia complecti; quæ ex æquo constituunt millaria quadraginta. Porrò Tabulæ recentiores designant à Bolonia ad Douerium millaria Anglicana sexdecim, nempe Italicis longiora, à Calesio vero octodecim. Quo liquidò constat à Bolonia in Angliam traiectum esse breuiissimum. Differunt itaque portus Gessoriacus, & Gessoriacum nauale: quod nouissimum si quis Casletum dixerit, nolim cum eo contendere. Hæc ille. Hanc ipsam Boloniam his verbis depingit Arnoldus Ferronius, qui Pauli Ämylij historiam Gallicam ad sua usque tempora deduxit. Est autem Bononia & inferior, quam vocant, & superior. Bononia inferior, vicus non septus mœnibus ante Anglorum aduentum; Ibi fanum Diuo Nicolo Sacratum, & aliud Franciscanorum Sodalium. Mare Anglicum vicum alluit: prope Fanum sodalium, quod non longe abest à mari, facillimus traiectus in Angliam. Abest à Bononia superiore centum ferè paſsus, & eò quid forte amplius. At Bononia superior, cincta mœnibus validissimis. Ibi fossæ præaltæ, muros ambientes. Totus ille locus sabulosus, ex eo genere, quod sabulum feruens maritimi homines vocant. Vnde Bononia nomen à feruenti sabulo, Gallico nomine inditum putant, tametsi vetus esse nomen ex Amm. Marcellino esse videamus. Hactenus Ferronius.

VEROMANDVI.

HVnc tractum, quem olim Veromandui inhabitarunt, hodie adhuc retento antiquo nomine VERMANDOIS vocant. Hinc duo flumina Soma & Schaldis originem sumunt. Hic olim teste Roberto Cœnali fuit Augusta Veromanduorum, nunc diruta, restante pro reliquiis Cœnobio, sedes olim Episcopalis. Vide de iis populis sententiam Petri Diuei, in libello antiquitatum Gallie Belgicæ.



